

Tertous ed 2020 in va s'in ramintuver! J'va chi vous n'in moutrer qu'eine journée, ch'est simpel all arsanne à tout's el z'autes.

Sitôt déjouqué d'sins lit ch'Gus i queurt dins s'mason inter s'cuisine et sin salon in pochant s'n'attestation dins s'main des fos in n'sait mie qui sérot contrôlé si qu'i s'arrê't rot tros quate minutes au cabinet. Pindant ch'timps là Raymonte s'feimme in rache all buque avec s'tapette à mouques pour estoquer ch'virus qui s'muche dins tous chés coins. Li voudrot l'aider mais pou qu'cheull' biête sans patt's all sorte i n'n'ont des russes, pa l'ferniête i crotte't qué ch'virusse va décamper... Mais comme ch' vint souffelle ch'est leus z'och's in attendant qui s'ingèlent!

Alorsse pou s'récauffer l'chervelle ch'Gus arvot sin patois: eune pache ed «mi», eune aute ed «li», «et pis des mi» à l'pelle. (Gus i jue d'aveuc les mots sans l'faire d'esprès.)

Pis pa l'ferniête i ravisse ses visins: i vot qu'Gaston ch'buveux tous les quinsse minutes d'un seul *cop vide* eine chope, adès forchémint qu'es feimme *Angèle a l'colique*, et qu'à l'presse leu grand fiu qui juot avec sin *cat contacte* in s'lamintant l'quinss' du Samu! Queu famille!

Dins l'mason d'à côté Igor et s'compagne Tatiana qui f'sottent el'tour du monte i s'treuvent té coinchés pa l'pin-démie: quate mos qu'cha dure et mes gins pinsent toudis et *incor au navire russe* qui dot les ram'ner au pays pou qu'i puichent arrier dins leu lanque: « Za zdrowia ».

Zeff l'sincier qui s'in va mouter ses vaques i rinconte sin viux n'instit qui s'apare: «une vache joyeuse hier qui je l'atteste paissait, erre triste ce jour...» Alorsse Zeff s'in va in grinchant dins s'moustaque: «li l'nez dins l'bousin i n'verrot pas que l'vaqu' sint!»

A midi, ed sin balcon D'siré pou rimplacher l'sirène i cante in buquant d'sus eine castrole:

«Confin'mint, déconfin'mint, arconfin'mint...

Ch'est l'canchon des con-con, des fi-fi, des né-né,

Ch'est l'canchon des confinés!»

A quatorsse heures pou daller querre ed quo minger tout l' famille s'in va, tertous à deux mètes l'un d'l'aute in file indienne printe des peun'tierres, et cueiller des pos d'chuque dins l'gardin ouvrier, ch'Gus prind l'masque à gaz d'sin taïon, s'feimme a coeud l'sien dins un viux drap troé pou laicher passer sin nez et s'fille eine innochie qui s'croyot à l'abri avec sin mascara tout c'qu' all a gagné ch't'eine pronne ed chent trinte chinq euros c'qui fait quer l'kilo d'pétotes!

Dins l'rue ch'Gus salue cheux qu'i connot avec sin pied, i checke avec sin coeute, et ch'n'est pont fachile avec ses romatisses. In pus d'cha pou n'pas paler à d'z'inconnus pace qu'i a l'droulle i teurne s'tiête, cange ed quémin, avinche, arcule, s'muche duss qu'i peut: in dirot qu'i-est in guinssel

I-avot bin assayé d'faire des *gesses aux bars hier* qu'i z'étottent freumés, foque i z'ont pas volu s'ouverre, ch'Gus qu'a eine rute caboche i-arcommince jord'hui. Mais rin n'cange! Adès avant qu'eul rue soit noirté i rinte à toute berzingue à s'mason duss s'feimme li pale tests hygiéniques au savon d'Marseille, et pis «*test sale hiver*» ain-sin qu'all dirot ein été biau, et all li intique des cotons tiches jusqu'au fond d'sin nez, d'ses orelles, dins s'bouque in'n' sait point dès fos qu'euch virus i s'y sarot muché su li pindant s'sortie!

I-a d'quo dév'nir zinzin, li conter chés tests i proteste toudis, i arot bin volu juer l'confin'mint mais fin'mint i n' sait pont alorse i compte chés mouques et chés araines à sin plafond...

L'soir nou coupe s'assit d'avant l'télé pace que ch'est toudis à vingt heures qu'cheux qui sait' té tout i vient' té dire qu'déhidémint ach'teur i-a pus rin à comprinte et qu'i n'peutt' té point nou z'expliquer commint ch' virus avec ses tiotes gambes i-est capape ed queurir à toute berzingue su l'tierre! Ein expert i dit blanc conter un aute qui dit noir, avec des graphiques duss qu'in y vot des courpes qui montent et d'z'autes qui deschintent... Ch'Gus qui a l'tournis pire qu'à l'ducasse su les montanes russes i bertonne: à croire qu'nou faire dév'nir bourrique cha les amusse!

Fort mates i vont s'couquer et pou bin laicher cheulle distance physique au mitan d'leu lit eune barrière in plesti-glache sépare chés amoureux. Ainsin chi chés ménaches i fait' té tertous comme cha ch'est certain qué d'z'infants dins neuf mos i n'ara pas grammint!

Et ch'Gus avant d's'indormir i s' délaminte: «ch'ti qui croyot qu'in décimpe ch'étot sûr qu'cha s'rot infin l'trêf des confineux, eh! Bin nan! Ch'est r'parti pour un tour ed manèche: l'tierre all teurne carré, in hiver i n'kait pus d'neiche, in invot dins l'ciel bleu qu'des neuaches ed carbone, ch'est pas cor l'fin du monte foque qu'in y queurt tout drot, car té vos Raymonte à forche d'escouer l'nature ch't'à l'homme qu'in fait du mau!»

Mais Raymonte qui connot sin racontache par cœur et qui sait qué d'main ch'cirque va r'commencer n'a point eu b'soin d'canchon dormoire: esquintée pa s'journée all ronfielle!